

Forelæggelsesnotat vedr. pkt. 58 FM 2010

Royal Greenland ilaannaaluunniit namminersortunut ingerlatassanngortinneqassappat pitsaaqutit pitsaanngequtillu pillugit Inatsisartut ukiamut ataatsimiinnissaannut nassuiaammik Naalakkersuisut saqqummiuseqqullugit peqquneqarnissaannik inatsisartut aalajangiiffigisassaattut siunnersuut. (Inatsisartunut ilaasortaq Ruth Heilmann, Siumut)

Saqqummiussiissut

(Naalakkersuisut siulittaasuat)

Siullermeerneqarnera

Aallarniutigalugu aalajangiiffigisassatut siunnersuummut Inatsisartunut ilaasortaq Ruth Heilmann Siumut qutsavigissavara. Naalakkersuisut isiginiartuarpaat siunissami ingerlatseqatigiiffiit namminersorlutik oqartussanit tamakkiisumik ilaannakortumilluunniit pigineqartut qanoq kissaateqarfiginerisa oqallisigineqarnissaat; taakkununga ilanngullugit suliassat piginnittuunerlu.

Taamaakkaluartoq Naalakkersuisut tunngaviatigut isumaqarpugut aktieselskabit ataasiakkaat periusissanut periusissatullu pilersaarutaat, namminersortunngornissamut pilersaarutaat imaluunniit periusissanut niuernikkulluunniit isummersuutaannut assingusut Inatsisartuni oqallisigissallugit tulluartuunngitsut.

Tamakkununga aktianik piginneqatigiiffinnut tunngatillugu aktianik piginneqatigiiffiit pillugit inatsisunik malittarisassaqarpoq, suliassat aktianik piginnittut siulersuisullu akornanni agguataarneqarnerat aalajangiunneqarluni. Siulersuisut piginneqatigiiffiup qullersaqarfianut aalajangersaalluni najoqqutassiissaaq sapinngisamik suliffeqarfiup pitsaanerpaamik ingerlanneqarnissaa siunertaralugu, piginneqatigiiffiup suleriaasissaanik aaqqissuilluni, qullersaqarfimmi atorfinitsitsinerit il. il. aktianik piginnittup, tassa Namminersorlutik Oqartussat, ataatsimeersuarnermi taasisinnaatitaanini atorlugu periarfissaqarpoq siulersuisunut ilaasortanik toqqaasinnaatitaalluni soraarsitsisinnaallunuunniit isumalluarfigisaminik pakatsisitaaguni.

Piginnittoq, Namminersorlutik Oqartussat, piginneqatigiiffiup ingerlatsineranut tunngasunik qanoq aalajangiisoqassanerani **peqqusisinnaanngilaq**. Tamakkua aalajangiinerit siulersuisut qullersaqarfiullu isumagissusaavaat, taamaaliornikkullu tunngaviatigut

periususartooq suliffeqarfinni ingerlatsineq pillugu aalajangiinerit tamakkiisumik politikikkut sunniisinnaanerup pinaveersaartinnissaa anguneqassalluni.

Aktieselskabimi piginnittuuneq mianernartuusoq Inatsisartuni oqallisigineqassappat pisariaqanngitsumik ingerlatseqatigiiffiup sulisuini, pisiniartartuini minnerunngitsumillu aningaasalersuisuini ernumalersitsisinnaavoq. Taamaammat Naalackersuisut Royal Greenland A/S pillugu Aningaasaqarnermut Ataatsimiititaliamut nassuiaammik isertuussamik nassiussisoqarnissaanik suliniuteqarniarput, taamaalilluni ataatsimiititaliami ingerlatseqatigiiffik taannarpiaq pillugu matoqqasumik eqqartuisoqarsinnaassammat.

Naalackersuisut suliassat sorliit pisortanit sorliillu namminersortunit aallunneqassanersut tunngaviatigut oqallinnissamut isumalluarput; taakkununga ilanngullugit aktieselskabit tamakkiisumik ilaannakortumilluunniit namminersorlutik oqartussanit pigineqartut pillugit. Ingerlatseqatigiiffiit tamakku oqallisigineqarnissaat kissaatigineqassappat tamanna aamma 2010-mi ukiakkut ataatsimiinnissamut atatillugu oqaluuserisassanut ilanngutissallugu tulluartuussaaq.

Namminersortunngorsaanissamut pilersaarutaasinnaasuni suut qulakkeertariaqarnersut eqqarsaatigalugit siunnersuuteqartumit siunnersuutit sisamaasut taamaalillutik Inatsisartut oqallinnerannut ilanngunneqarumaarput.

Taamaammat siunnersuut taamak isikkoqartillugu itigartinneqarnissaa inassutigineqarpoq.